

OHR prenio nadležnosti na domaće organe

Načelnici općina Žepče i Gornji Vakuf –Uskoplje jučer su informirani o Odluci visokog predstavnika kojom su okončani režimi supervizije međunarodne zajednice u tim općinama.

Visoki predstavnik je rekao da je OHR u posljednjih nekoliko godina nastojao olakšati integraciju i nesmetano funkcioniranje ovih nekada podijeljenih općina. Režimi supervizije koji su uvedeni 2000. godine za Žepče a 2001. za Gornji Vakuf-Uskoplje pomogli su objema općinama da postignu značajan napredak u zastupanju svih građana i obezbjeđenju boljih usluga za sve njih. Ovim je došlo vrijeme da se i stvarna a i zvanična odgovornost za upravljanje ovim gradovima prenese na domaće organe.

“Vjerujem da je došlo vrijeme da se okončaju specijalni režimi. Žepče i Gornji Vakuf-Uskoplje bez sumnje su postigli takav nivo ujedinjenja da je svaki nastavak supervizije od strane OHR-a nepotreban,” rekao je visoki predstavnik.

Obavještavajući o svojoj odluci predsjednike HDZ i SDA, Barišu Čolaka i Sulejmana Tihića, kao i nadležne lokalne zvaničnike, visoki predstavnik je naglasio da ove stranke mogu doprinijeti zajedničkom dobru u dugoročnom smislu ukoliko apeliraju na lokalne organe u obje općine da svoje gradske statute usklade sa zakonima FBiH.

“Generalni cilj bio je da se podijeljene općine ponovo ujedine, da se ukinu paralelne administrativne strukture te ujedine sve javne služne i druga javna preduzeća u obje općine. U toku protekle tri godine, ovaj cilj je u najvećoj mjeri postignut,” rekao je visoki predstavnik, dodavši da je ovom odlukom OHR okončao svoju ulogu interveniranja i rješavanja sporova u općinama.